

Pa su amor y dedicacion na Bario di Brazil:

Luis Inario Maduro a ricibi reconocimiento di Gobierno como un baluarte

ORANJESTAD (AAN): Durante BarioFest na Brazil diadomingo ultimo, den number di Gobierno di Aruba y Minister Glenbert Croes, Prome Minister Evelyn Wever-Croes a entrega reconocimiento na 5 baluarte di Brazil: Angelo Richardson, Giandrick van den Berg, Luis Inario Maduro, Heintje Ras y Vicente Ras. Cada nominado a resalta den diferente area. Prome Minister, tur dia den e siman aki lo elabora riba un nominado siguiendo awe cu Luis Inario Maduro.

Luis Inario Maduro tabata un futbolista hopi dedica na e deporte. Pero su amor grandi pa e bario di Brazil y e muchanan y hobennan den bario, tabata impulsa señor Luis pa dedica su tempo pa mehora e bario y yuda nos muchanan pa nan por practica deporte y keda riba e bon caminda.

Den añanan 70, señor Luis a logra un Veld di Softball

na Brazil, 'Detroit Ball Park' pa yuda muchanan di bario hunga softball y baseball. Riba cua veld, Sint Michael School tabata uza pa haci sport y hopi campeonatonan nacional y internacional a tuma luga.

Tambe riba e tereno di musica, señor Luis a destaca y a hiba e alegria di musica den e bario di Brazil. Den año 50, el a yuda funda 'Conhunto Los Bigotes'. Un cantante di Dande di su propio grupo cu tabata pasa canta den bario di Brazil. No solamente señor Luis tabata bon tocado di tambu, pero tambe tabata rekdo di cuero tambe y ta traha su mesun tambu. Tambe el a traha un caha di orgel y tocando wiri, e tabata compaña señor Cornes Noguera cu su caha di orgel Victoria na diferente fiesta den Brazil.

Banda di musico, Señor Luis tabata Barbero y doño di su mesun barberia na unda cu e tabata pela mucha



y hende grandi na un prijs hopi abou mes, casi pornada. E tabata pela esnan malo te na nan cas.

Siendo tambe un hopi bon metsla, señor Luis a yuda hopi hende di e bario di Brazil cu diferente trabou cobrando un prijs hopi barata pa su trabou.

Esaki ta di 4 Bariofest cu ta wordo organisa pa Special

Projects y ta resorta directamente bou di Ministerio di Asuntunan Social. Pa e ocasion aki, Special Projects ta duna oportunidad na pueblo pa nomina baluartenan, personanan cu a resalta den comunidad. Y durante Bariofest, e personanan aki ta wordo reconoci. Señor Luis Inario Maduro ta un habitante cu a stima di curason

su Bario di Brazil y ta pa e motibo aki tambe, pueblo di Brazil a nomina como un baluarte.

Den number di Gobierno di Aruba y Minister Glenbert Croes, Prome Minister a felicita Señor Luis Inario Maduro cu su nominacion y a gradici Señor Luis pa su trabao na bario di Brazil y pa Aruba en general.